

Hanya 175,000 daripada 500,000 penghantar makanan mencarum Perkeso

Kesedaran rider mencarum rendah

Oleh MOHD. YUNUS YAKKUB



MOHAMMED AZMAN (kanan) menyampaikan faedah Perkeso kepada Nur Izwana di kediaman mentuanya di Rantau Panjang, Klang semalam.

KLANG - Tahap kesedaran pendaftaran dan pencaruman Orang Bekerja Sendiri (OBS) kepada Pertubuhan Keselamatan Sosial (Perkeso) masih kurang memberangsangkan terutama di kalangan p-hailing.

Ketua Eksekutif Perkeso, Datuk Seri Dr. Mohammed Azman Aziz Mohammed berkata, setakat ini hanya 175,000 pekerja p-hailing sama ada penghantar makanan dan barangan daripada 500,000 OBS termasuk kategori p-hailing dianggarkan di seluruh negara.

Katanya, bayaran caruman bulanan bagi kategori tersebut dibawah Akta Keselamatan Sosial Pekerjaan Sendiri (Akta 789) hanya RM46.60 sebulan sahaja atau 20 peratus menerusi Pelan

Caruman kedua Skim Keselamatan Sosial Pekerjaan Sendiri (SKSPS)

Baki 80 peratus atau RM186.20 dibiayai sepenuhnya kerajaan.

"Tidak sampai RM4 sehari pun, jadi jangan ini anggap satu beban dan fikirkan keluarga."

"Kalau sayang keluarga tampil dan jangan fikir dua kali dan fikir beban. Kita bukan semata-mata ambil caruman tetapi lebih kepada jaringan keselamatan sosial kepada pekerja, keluarga dan waris demi kesenangan hidup," katanya.

Beliau sebelum itu menyampaikan sumbangan faedah Perkeso kepada Nur Izwana Othman, 26, yang merupakan balu penghantar Grab di rumahnya di Rantau Panjang, di sini semalam.

Nur Izwana kehilangan suaminya, Allahyarham Muhaimin

Said, 34, yang maut dilanggar sebuah kenderaan utiliti sukan (SUV) di persimpangan lampu isyarat Jalan Haji Sirat pada 23 September lalu.

Menurut Mohammed Azman, semakan mendapati Allahyarham Muhaimin pernah mencarum di bawah Akta Keselamatan Sosial Pekerja 1969 dan Akta 789.

Ujarnya, ini melayakkan menerima pencen penakat di bawah Skim Keilatan berjumlah RM882.98 sebulan yang dibayar secara berkala sepanjang hayat.

Selain itu, kata Mohammed Azman, faedah Orang Tanggungan berjumlah RM837 sebulan yang dibayar seumur hidup serta Faedah Pengurusan Mayat sebanyak RM2,000 untuk sekali bayar dibawah Skim Keselamatan Sosial Pekerjaan Sendiri (SKSPS).